

## **FESTA TRANSFIGURASAUN NIAN**

Festa Transfigurasaun Na'i nian hahú selebra iha Oriente iha sékulu V, no iha Osidente iha 1457. Transfigurasaun ne'ebé akontese molok anúnsiu Paixaun no Mate nian, prepara Apóstolu sira ba komprensaun mistériu ne'e nian. Ho objetivu hanesan mak Igreja selebra festa ne'e loron haatnulu molok Ezaltasaun Krús nian, iha 14 Setembru. Transfigurasaun, manifestasaun vida divina, ne'ebé horik iha Jezús, mak antispasaun glória nian, ne'ebé sei hakonu kalan Páskua nian. Apóstolu sira, bainhira haree Jezús nia kondisaun Atan nian, labele haluha ninia kondisaun divina.

### **Leitura I - Daniel 7, 9-10.13s.**

Daniel, iha vizaun kalan nian, haree istória husi Maromak nia matan. Ukun sira no opresór sira sei troka malu, maibé Maromak nia projetu la falla. Nia mak juíz ikus, ne'eé sei avalia ema sira nia hahalok no sei intervein atu soi nia povu. Hasoru reinu sira "Katuas" kontrapoin Reinu ne'ebé konfia ba "mane nia oan" misteriozu ida mai iha kalohan leten. Nia mak mane loloos ida, maibé ho orijen divina.

Iha ita-nia testu la'ós Mesias David nia oan nian ne'ebé sei manán fali Reinu Israel nian, maibé ninia transfigurasaun sobrenatural: Mane nia Oan mai inaugura reinu ida ne'ebé, maski tama iha tempu, "nia la'ós mundu ne'e nian" (Jo 18, 36). Nia sei triunfa hasoru kbiit sira rai nian, hodi lori istória ba ninia realizasaun eskatolójika. Jezús sei identifika nia An dalabarak ho figura bíblika ida-ne'e iha ninia pregasaun no ho modu partikulár iha Sinédriu, ne'ebé kondena Nia ba mate.

### **Leitura II - 2 Pedro 1, 16-19**

Pedro ho ninia maluk sira rekoñese sira-nia an nu'udar maklorik grasa id aboot liu profeta sira-nian, tanba rona lian husi lalehan ne'ebé proklama Oan-Mane doben liu Aman nian, Jezús, sira-nia Mestre. Maibé Liafuan Testamentu Tuan nian kontinua sai "ahi-oan ne'ebé lakan iha fatin nakukun ida" (v. 19), to'o loron lahó rohan, bainhira Kristu mai iha ninia glória. Jezús ne'ebé nakfikak an sustenta ita-nia fiar no halakan iha ita hakaran esperansa nian iha ita-nia dalan iha rai ne'e. "Fitun dadeersaan" nian nabilan ona iha fuan ne'ebé hein ho vijilánsia.

### **Evanjellu - Lucas 9, 28b-36**

Transfigurasaun konfirma Apóstolu sira-nia fiar, ne'ebé Pedro hatudu iha Cesareia Filipe nian, no tulun sira ultrapasa sira-nia opozisaun hasoru perspetiva paixaun ne'ebé Jezús fó sai ba sira. Ema ne'ebé hakarak sai nia dixípulu, tenke partisipa iha ninia sofrimentu sira (Mt 16, 21-27. Transfigura mak glória divina Oan-Mane ninia nabilan dahuluk, Nia ne'ebé simu bolun atu sai Atan terus-na'in ba ema sira. Iha orasaun, Jezús nakfilak an no husik Apóstolu sira haree ninia identidade sobrenatural. Moisés no Elias mao protagonista sira Ézodu nian diferente liu iha sirkunstánsia sira, maibé idéntiku iha motivasaun: fidelidade absoluta ba Maromak. Naroman Transfigurasaun nian klarifika interiormente dalan iha rai ne'e. Bainhira vizaun atu remata, Pedro hanesan koko atu para tiha tempu. Nune'e mak kalohan ida falun tiha nia no nia maluk sira. Ne'e mak kalohan prezensa Maromak nian. Mistériu ne'ebé revela maibé ita kontinua la koñese. Maibé Pedro, Tiago no João simu roman nabilan liu: lian lalehan nian ne'ebé proklama Jez'us nia identidade, Oan-Mane no Atan Terus-Na'in (kf Is 42, 1).